



**Naalakkersuisut kingusinnerpaamik UPA2020-imut Aasianni annertuumik innarluutillit angerlarsimaffiannik pilersitsinissaminnut pilersaarusoqqullugit peqquneqarnissaanik siunnersuut.**  
(Inatsisartunut ilaasortaq Stine Egede, Inuit Ataqatigiit)  
(Siullermeerneqarnera)

Inatsisartunut ilaasortaq Stine Egede qutsavigerusupparput siunnersuutaa pillugu.

Demokraatini nuannaarutigaarput ukiut kingulliit marlussuit ingerlanerini innarluutilinnut sullissineq siuariarfiusimammat, tassani ilaatigut massakut ataatsimiinnermi oqaluuserisussaavarput inatsit nutaaq inuit innarluutillit ikiortariallit pillugit.

Uangutsinnut pingaarnepaat ilagaat ikiuinerup pitsaasuunissaa amerlasuunik ikiuinermut naleqqiullugu. Kissaatigaarput innarluutillit sullinneqartassasut inunnit piginnaanikillisisimasunik sullissinissaminnut sapinngitsunik.

Ulloq unnuarlu angerlarsimaffiit pillugit 2017-mi ukiumoortumik nalunaarusiami ajoraluartumik takusinnaavarput sulisut amerlanerpaartaat pisariaqartinneqartunik ilinniarsimangitsut imaluunniit perorsaaniikkut piginnaaneqanngitsut kiisalu sulisut paarlakaajaannerujussuisa sullinneqarnissaminut pisariaqartitsineq naammassineqarsinnaanngitsuq. Taamaattumik Naalakkersuisut tamatumunnga ernummateqarmata paasilluarsinnaavarput. Aamma taamaattumik Naalakkersuisut isumaqatigaagut oqarmata immikkoorluinnartuni taakkunani immikkoortuni pisariaqartinneqartunik ilinniagalinnik sulisussarsisinnaasanninneq immikkut sulisutigisariaqaripput, malunnarmat ulloq unnuarlu angerlarsimaffiit ullumikkut peqqinnisaqarfimmi ajornartorsiutigineqartut assigninik ajornartorsiuteqartut.

Napparsimasunik sullissineq eqqarsaatigalugu sulisut pigineqartut qitiusumik ingerlatsivinni sulisorineqarusupput napparsimasut sapinngisamik pitsaanerpaamik ikiorumallugit. Taamali ajornanngitsigisumik aaqqiisoqarsinnaanngilaq inuit ataavartumik piginnaanikillisisimasut eqqarsaatigalugit. Isumaqarpunga mianersoqqissaartariaqartugut soorunami kissaatiginarmat, innuttaasoq ikiortariaqartoq sulisunit ilinniarluarsimanerpaanik ikiorneqartassasoq, paarlattaanngitsunit ullumikkut peqqinnisaqarfimmi sulisorineqarluartunit.

Takornartaanngilaq iliuusissanut pilersaarusiortoqartannginnera. Sulisut paarlakaattorujussuupput. Sulisussarsiortarneq sulisooreersullu piginnarnissaat ajornartorsiutaavoq. Ilinniaqqittarneq, piginnaanngorsaasarneq aamma piginnaasanik qaffassaaneq amingaataavoq piffissaqartoqannginnera pissutaalluni. Akissarsiat pitsaanerusinnaapput. Assigiinngitsunik ilinniagallit ikioqatigiippiarneq ajorput aamma meeqqeriviit illutitigut atortorissaarutitigullu kinguussaaqqapput. Ajornartorsiutit tamakku ilumut



piviusuusut uppersineqarnikuvoq Danmarkimi Socialstyrelsen naluarsuaani " Kalaallit Nunaanni meeqqat inuusuttullu ulorianartorsiortut pillugit Kalaallit Nunaanni Namminersorlutik Oqartussat ikorferneqarnissaannut suliniut" aamma isumaqarpugut taamaattumik ajornartorsiutit erloqinartut tamakku iluarsinissaaq sulissutigisariaqaripput ajorseriartinniarsarinagit, nalunaarummi misissuinermilu periarfissat kingunerusussallu tikkuarneqareermata taamaasillutalu uangut isumarput naapertorlugu tungavissaqareeratta iliuuseqarnissatsinnut.

Siunnersuut taamatut isikkoqarallartillugu itigartipparput.